


LOS LAGA BAY 15 AÑA TA KANA DEN...



Emile de Cuba

E aña aki "Los Laga Bay" ta celebra su di 3 lustro den carnaval, John Fingal, Emile de Cuba y Jan Bodeker dia 20 di Januari 1983 sinta anochi na bar di Manchebo Beach Hotel tabata tin un problema serio. No problema di alcohol, pero problema di por join parada di carnaval John y Jan a participa den grupo "Bankanaden" cu a wordo desolvi e aña anterior. Emile tabata cu "Tivoli" y su ultimo dos añanan cu "Esso Club".

E trio a dicidi e ora ey pa bini cu un grupo chiquito, barata y cu disfraz facil y drenta parada, con cu para keda. Algun dia despues nan a haya Tico de Cuba, sigui pa Madeleine Kock y Yolanda de Cuba pa uni cu nan. Mauricio v.d. Ree di Arston Corperation a duna apoyo moral y material. Emile tabata traha cune. A dicidi di bini cu e tema "Come as you are" esta cu cada un por a bin disfraz manera e kier. E number di e grupo a bira e ora ey "Los laga bai", "Laat de boel maar waaien" of "Let it all hang out".

Pa Bar Emile tabata tin un flatbed truck y Jan Welmers na unmanera unico y chistoso a percura pa trabao di arte riba e bandanan cu a ser monta riba e flatbed. E no a cobra pa su trabao pero si a paga pa su inscripcion. Esey tabata e espirito semper den e grupo. Jan a sigui varios aña mas cu e grupo despues.

A contrata Hells Angels brassband pa 4 mil florin y den poco tempo a logra haya

125 participante na 100 florin cada. Gobierno (via SAC) a contribui cu mil florin den gasto di banda y "Los laga bai a gana un premio difls. 100,-. E presupuesto total tabata di 13.600 florin.

Como cu indicacion tabata cu lo sobra placa, a organiza un "Jouvert Warmup party" na "Hoffie Chona", laga Manchebo cater cuminda pa parada y BBQ durante un fiesta na Manchebo y placa a caba...A keda un deficit chiquito di 73 florin.

Cos a bay tremendo, tur hende a goza un bol, y e grupo a haci basta impacto, positivo y negativo. Tabata tin bastante critica riba e disfraz, e grupo tabata "slordig, bruha, desorganiza" tabata comentarionan, pero esnan cu a critica no a com-pronde e filosofia tras di e grupo cu ta "Goza hopi, gasta poco", pues "Los laga bay". Pero e criticanan no a molestia e iniciadoman cu a cumpli cu nan "mision", participa den parada.

Ora cu Emile a pensa di cumpli cu locual el a pensa na Manchebo di lo participa e aña siguiente cu Esso, a resulta cu di tempran caba e participantenan di "Los laga bai" a cuminsa aserke pa ripiti e grupo. E presion a bira asina grandi cu no por a haci nada mas cu bin cu un di "dos edicion di Los Laga Bai". Despues a sigui di tres y asina a sigui te cu e aña aki "Los laga bai ta celebra su di tres lustro". No ta tur aña cos a bay facil. A pasa den turbulencia, pero

cu perseverancia y creatividad semper e grupo a sa di logra resultado positivo.

Porehemplo na 1985 y 1986 (despues cu Lago a cera) e grupo tabata na e nivel mas abao di su historia y placa no tabata yega. Mester a comparti un brassband hunto cu Colegio Arubano na 1985 y MAO school na 1986. Ta e fighting spirit aki a logra tene e grupo na bida te cu awe, hopi biaha solucionando problema serio sin cu e miembronan mes tabata sa.

Na 1986 Robert Nieuw cu Lenor NV a sponsor e grupo pa prome biaha hunto cu Associated Engineers & Planners NV di Tico Petronia kendenan ta miembronan fiel di e grupo y sigur tabata tin duele cu "Los laga bai". Su problemanan y kibramento di cabez.

E aña siguiente e grupo a haya su empuhe mas grandi ya cu Albo NV/Arubaanse Wegenbouw Maatschappij NV a join e fila di sponsornan y te awe ta fiel patrosinador y importante pa e grupo, yudando financieramente y cu equipo.

Na 1992 e grupo a haya otro empuhe importante ora cu Esso Petrolera a bira nan sponsor y a keda asina te cu 1995 ora cu Heineken a tuma over.

Desde 1993 nan por a conta tambe cu Antil y pa varios aña tambe cu Kooltemp cu ta coopera cu pickup y chofer pa tek e bar. Xerox tambe a join e fila di sponsornan.

Di 1983 pa 1988 semper e grupo a bay cu Brassband pasobra no tabata tin placa pa bay cu banda. Na 1989 prome biaha Los Laga Bai a haya banda riba truck y di eynan no a wak atras mas. Tres biaha nan a subi caya cu musica di "Musical Force (Tropics), dos biaha cu "Eclipse" y e aña aki lo ta di cuater salida cu "Robert y su Solo banda Show".

Un pilar pa stoma e grupo aki tabata tin tur aña di Ewald Biemans actual gerente di Bucuti Hotel, anteriormente di Manchebo. Nan a percura pa stoma durante y despues di parada e BBQ. Gordon Toussaint tabata percura pa e musica y sonido durante fiestanan di BBQ.

Desde cu brassband a cambia pa trailer cu banda, Oscar y Ivo Daal di Daal Transport a colabora cu tractor pa band trailer. Den POPO lo por lesa di e "tractor Moribundo" di 1979 cu ta e aña cu ta un otro persona a colabora cu tractor debi na un malentendimiento.

Aña di Status Aparte, e grupo a haya un bar trailer aparte. Nan a haya nan propio bar trailer cu apesar di e toneladanan di cervex y refresco cu e mester a carga tur e añanan a wanta basta. Tico de Cuba a trahe y e gasto tabata 3 mil florin. Nan a keda. E grupo a keda crece y mester a bini cu otro trailer y Albo/ Arubaanse Wegenbouw a coopera cu esaki.

Aña pasa e grupo a cumpra bar coolers nobo pa 5 mil florin ya cu e grupo ta prefera di tin tur cos di nan mes. Falta ainda pa cumpra dos generator. E propiedadnan di Los Laga Bay actualmente tin balor di 35 mil florin. Na interband nan tin un cifra di 5 mil florin cu nan a habri aña cune. E grupo ta percura pa banda cu tractor, bandtrailer, generator, cuminda, bebida, uniform y percura pa seguridad di nan participantenan. Nunca tabata tin un incidente di lamenta.

POPO lo elabora riba e anecdotan, jokes y semicatastrofenan di e grupo cu awe tin 5 miembro cu 15 aña participando, 5 cu 14 aña. Cinco tin record perfecto di participacion. Nan ta Madeleine, Yolanda, John, Emile y Tico cu awe ta tecnico.